



Presion di Gobierno



A manda yama nan 'op het matje' pa motibo di supuesto tardansa den esaki

Raad van Advies presiona pa Gobierno riba concepto di ley di tram

ORANJESTAD — Gobierno no ta nada contento cu e forma con e organo consultativo conoci como Raad van Advies ta actuando pa cu e asunto di tram, y a hala nan atencion siman pasa. E resultado ta cu a manda yama nan 'op het matje' pa puntra e 'un que otro'. **BON DIA ARUBA** a compronde cu Gobierno ta poniendo presion riba Raad van Advies pa manda conseho lihe riba e conceptonan di ley cu ta regarda e proyectonan di e tram. Sin e consehonan aki, e proceso di legislacion ta para, cu consecuencia cu e tram no por core legalmente riba caminda den e periodo cu gobierno a priminti.

Investigacion cu **BON DIA ARUBA** a haci, a trece varios punto dilanti cu ta por a splica e tardansa di Raad van Advies pa cu e leynan aki. E prome ta cu e ley a yega Raad van Advies demasiado laat pa e

conseho por keda cla na tempo. Banda di esey, no a traha un presupuesto pa e proyecto di tram y tampoco e tram a wordo hinca den presupuesto di Pais Aruba di 2012. Ora cu gobierno kier cumpra algo — sigur un proyecto asina caro manera e tram- e mester di un apoderacion di Parlamento, y si esey no a tuma luga, mester haya apoderacion pa medio di presupuesto general of un ley special. Esey tampoco a sosode segun **BON DIA ARUBA** por a compronde for di su investigacion.

Tur esey ta trece dilanti e siguiente preguntanan, manera ken a cumpra e tram, y ken a paga pa esaki y ken ta e doño legal di e tram. Manera **BON DIA ARUBA** a raporta, den varios instancia, a bin sali na cla cu Gobierno lo a 'lubida' di prepara un concepto di ley pa e proyectonan di tram. Algo cu Gobierno nunca no



a desmenti. De hecho, ora cu **BON DIA ARUBA** a publica cu pa motibo di esaki e tram lo no por core na tempo, a duna ordo na Directie Wetgeving pa dentro di un of dos siman, presenta un concepto di ley pa e proyecto di tram.

Mientrastanto Raad van Ad-

vies tin e presion di Gobierno pa keda cla cu e consehonan aki, siendo cu Raad van Advies a muestra cu nan ta man yen cu por lo menos 16 otro concepto cu tin prioridad riba e proyecto di tram. Conceptionan primordialmente fiscal cu tin cu keda cla prome cu fin di aña pa e por drenta na vigor.

Como tal e proyectonan di ley di tram no lo por keda cla pa wordo trata e fin di aña aki ainda, te pa e wordo aproba pa parlamento.

Esey ta pone e ora cu gobierno no por cumpli cu e promesa cu e tram lo ta coriendo den Caya Grandi prome cu fin di aña. □